

RIGHT TO EDUCATION ACT 2009

Harsatna tam tak a kaltlang hnuah India ramah *'The Right to Education Act'* chu April 1, 2010 ah khan tihpuitlin a ni ta a. He ni hi India mite tana hriatreng tlak a ni a, a chhan chu hemi ni atang hian *'Right to Education'* chu Indian Constitution-a Article 21A-a, *'Right to Life'* nen dinhmun inangkhata dah a ni ta.

India danpui **Chapter 4-a, Article 45** hnuaiia *Directive Principles of State Policy* peng pakhat atan *Right to Education* hi dah thin a ni a. Amaherawhchu, Chapter 4-a *'right'*-te hi hman theih mai a ni chuang lo a ni. Tunah erawh chuan *'Right to Education'* hi hman ngei anih theih nan India danpui **Chapter 3, Article 21-a** dah a ni ta a ni. Hemi avang hian naupangten zirna a an chanvo neih te chu an *Fundamental Right* lo niin zirna chu naupang zawng zawngte chanvo alo ni ta bawk a ni.

Right to Education hian zirna ruahman dan tur leh pekchhuah dan turah kalphung thar a rawn siam a. Mi zawng zawng tan tih tur leh chanvo thar a pe. Zirna lama mawhphurtute zawng zawng kan inpuahchah a, kan chanvo thar atan kan in buatsaih a tul hle mai.

India Prime Minister, **Dr. Manmohan Singh-a** chuan a naupan lai chanchin sawi in, khawnvar eng hnuaiia harsa taka a zir thin avanga tun dinhmun thleng thei anih thu a sawi a. Tichuan, zirna eng hian mitin thleng phak ve se tiin, *Right to Education Act* tihhlawhtlin a nih ngei theih nan a hnuaiia mite hi a rawn tarlang a:-

- (i) Naupang zawng zawngin zirna an dawn theih nan sum tam tawk dah ani ang a ti.
- (ii) Naupang zawng zawng mipa emaw hmeichhia emaw eng dinhmuna ding pawh nise India khua leh tui tha an nih theih nana thiamna leh hriatna pe theitu zirna tha an dawn theih nan sawrkar a in huam a ni.
- (iii) Education tuantling – themthiamnate, hriatnate, ngaihhlut zawng dik leh nunphung dik, khua leh tui tha leh mawhphurhna la tlak India mi chherchhuah a duh a.

Right to Education Act 2009 thu ken tlangpuite:

- India ram naupang kum 6-14 inkar te tan – *Free and Compulsory Education*.
- Naupang tupawh elementary education an zawh hma chuan fail tir, hnawhchhuah leh board exam tir phal an ni lo.
- Naupang tupawh kum 6 chin chunglam school la lut lo emaw lut tawha elementary education la zo lo te chu an kum rualpui te class-ah admit nghal theih an ni, chutih rualin midang te rual an pawl theih nan hun bituk bik neia a bika ngaihven tur an ni. Elementary education an zawh hma chuan kum 14 pel mah se a thlawna zirna pek an ni tur a ni.
- Admission-na atana kum tichiangtu: Naupang school lut tur te chu, *Births, Deaths and Marriages Registration Act 1856* in a lo duanlawk angin Birth Certificate emaw certificate dang kum lanna hmanga admit tur a ni. Amaherawhchu naupangin kum lanna document a nei thei ngang lo a nih pawhin admit tho tur an ni.
- Naupang elementary education zo chu certificate pek tur an ni.
- Jammu & Kashmir tih lovah chuan hman vek tur a ni.
- Private school-ah miretheite tan, class-I zir turin seat 100 a 25 dah bik a ni.
- Zirtirtu chuan zirtirna atana a mamawh degree kum nga chhungin a nei ngei tur a ni a, a nih loh chuan a hna a chan ang.
- Sum leh pai mamawh chu state leh central sawrkarin an intum sem ang. North-East tan 90:10 ratio a nih laiin India ram state dang zawng tan chuan 65:35 ani thung.

Right to Education Act 2009 a bungte:

Chapter I – Preliminary

Definition he Act chhung a hmante a sawifiah. A pawimawh zual leh hriat chian ngai leh harsa zualte tlem tarlang ila:-

(f) “Elementary Education”

Class I – Class VIII sawina a ni.

(h) “Local Authority”

Local authority chu heng sawina te hi a ni –

- Municipal Corporation
- Municipal Council
- Zila Parishad
- Nagar Panchayat
- Panchayat
- Village Council
- School chung a thuneitute

(i) “National Commission for Protection of Child Rights”

Commissions for Protection of Child Rights Act 2005 (4 of 2006)
Section 3 hnuiaia National Commission for Protection of Child Rights
sawina a ni.

(l) “Prescribed”

He Act hnuiaia dan (rules) siamte.

(n) “School”

Elementary School, sawrkar recognize/hriatpui sawina a ni a, entirnan

- i. Sawrkar emaw khawtlang thuneitute school din an enkawl zui bawk.
- ii. Sawrkar/khawtlang thuneitute atanga tanpuina (grant/aid) dawng lai school te.
- iii. Specified category hnuiaia school te
- iv. Sawrkar emaw khawtlang thuneitute emaw atanga tanpuina dawng reng reng lo school te.

(p) “Specified Category”

Heng school sawina te hi a ni –

- Kendriya Vidyalaya
- Navodaya Vidyalaya
- Sainik School

Heng bakah hian a bik (tum bik) school sawrkar leh hriatpuina/thuchhuah hmanga dinte sawina a ni.

(q) “State Commission for Protection of Child Rights”

Commission for Protection of Child Rights ACT 2005 (4 of 2006) section 3 hnuiaia din State Commission for Protection of Child Rights sawina a ni.

Chapter II – Right to Free and Compulsory Education

- Naupang kum 6 atanga kum 14 inkar zawng zawngte chuan elementary school an zir chhuah thlengin a thlawna zirna, anmahni thenawm hnaivaiah an dawng tur a ni.
- Naupang tumahin fee an chawi tur a ni lova, elementary zir tur leh a zir zawhna dal turin engmah an sen a ngai tur a ni lo bawk.
- Naupang rualban lohna nei PWD Act, 1996 section 2-na clause (i) in a sawi angin elementary education chu a thlawnin an dawng ngei tur a ni.
- Naupang kum 6 chung lam ni si, school-a ziah luh loh an nih emaw, ziah luh hnuah elementary education chin zir zo lova an tawp san a nih emaw pawhin, a pawl tawk awmah luhtir leh tur a ni.
- Naupang chu a kum mil tawk pawlah ziah luh nghal a nih chuan, midangte ruala a zir thiam ve theih nan a bika training hun tiam chhungin leh tih dan tur ruahman angin a dawng ngei tur a ni.
- School naupangte chuan elementary education an zir zawh thlengin a thlawnin zirna an dawng tur a ni a, kum 14 an pelh hial thleng pawhin an dawng thei ang.
- Transfer thua chuan, naupangin school a luhnaah chuan elementary education zir chhuahna tur awm lo ta se, Chapter –I (n) hnuiaia sub number (iii) leh (iv)- a tarlante tiam lovin school dang eng school-ah pawh transfer theih a ni ang.

- School danga admission dil turin a school kalna hnukung bera Headmaster emaw, in-charge emaw chuan transfer certificate chu a pe chhuak nghal tur a ni.

Chapter III – Duties of Appropriate Government, Local Authority and Parents

He Act tih hlawhtlinna atana mawhphurtu te:-

State sawrkar mawhphurhna:-

- A thlawn in naupang kum 6-14 te tan zirna a pe tur a ni.
- Heng naupang kum 6-14 te hian school an lut a, an kal ngei a ni tih leh elementary education an zo ngei a ni tih a enfiah tur a ni.
- Veng tinah school din tur a ni. School awm lohna hmunah, state sawrkar in kum thum chungin school a sa tur a ni. RTE ruahman dan chuan, 1 km bial chhungah primary school a awm tur a ni a. Middle school hi 3 km bial chhungah a awm tur a ni.
- He dan hian naupang a huam turte tumah a hmaih tur a ni lo.
- Naupangte chu an nu leh paten school an luh tir ngei tur a ni a, an mawhphurhna hi an hlen ngei tur a ni.
- Zirna tha leh belh chian dawl - *School building tha - zirtirtu tha - zirna hmanraw tha....* naupang te tan a awm tur a ni.
- Zirtirtute tan training tha a pe tur a ni.

Khawtlang thuneitute mawhphurhna :-

- School building an enkawl ang.
- Naupang dinhmun hnuaihning zawkte chanvo an humhalh sak ang.
- Naupang kum 6-14 chin record fel tak an siam tur ani..
- Naupangte school an lut ngei a ni tih leh an zir zo ngei a ni tih an enfiah tur ani.
- Zirlaiten zirna tha an dawnna atana pawimawh pek ...zirtirtu tha – zirna hmanrua tha – zirtirtute training hmangin an thuam phuisui ang.

- Naupang pem te admission an buaipui ang.
- School inrelbawl dan ruahman pui a, an zir dan tur (Academic Calendar) an duan pui tur ani.

Nu leh Pa te mawhphurhna :-

- Nu leh pa zawng zawng ten an fate emaw fate anga an enkawlte emaw Elementary School hnai berah an admit ngei ngei tur a ni.
- Private school-ah nu leh paten an fate an dah chuanin a thlawna zirna pekah sawrkarin mawhphurhna a nei lo.

Chapter IV – Responsibilities of Schools and Teachers

- Purely Private school & Special Category school ten Class-I ah 25% tal rethei zawk leh ST/SC, etc te tan seat an dah tur a ni.
- School lut tur thlan (screening) leh capitation fee lak khap tlat a ni.
- An kum tarlanna document awm loh avangin naupangten admission ah buaina an tawk tur a ni lo. Naupang chu admit phawt a, kum lanna certificate chu a hnu a dil tur a ni. An nei thei lo a nih pawhin admit theih tho an ni.
- School hmun nei sa ten compensation an dawng thei tawh lovang.
- School tin ten hriattirna an dawn a tul angin an bawhzui tur a ni.
- Elementary education an zawh hma chuan fail tir leh hnawhchhuah an awm tur a ni lo.
- Hremna pek loh tur a ni a, rilru hnual khawpa siam loh tur an ni bawk.
- School enkawltu committee din tur a ni a, 75% memberte hi nu leh pa an ni tur a ni. He committee hian school kal dan leh hnathawh dan te endikin a vil ang.
- Kumtluanin admission an hawng tur a ni.
- Sawrkar/Local authority hriatpuina tel lovin school din phal a ni lo. School ding sa te chuan RTE hman anih atanga thla 3 chhungin RTE

Schedule-a norms leh standards a zawm a ni tih DEO hnenah an hriattir tur a ni.

- Central sawrkar ruat academic authority-in zirtirtu qualification ngai chin a siam ang.
- Zirtirtu thawk tawh, he qualification nei si lo chuan kum nga chhungin a nei ngei tur a ni.
- Zirtirtute mawhphurhna – regularity, punctuality, curriculum zawh fel hman, etc. tarlan a ni.
- RTE Act hman atanga thla 6 chhungin school tinah Pupil Teacher Ratio zawm tur a ni (Class 1-5 = 1:40, Class 6-8 = 1:35).
- Zirtirtute chu census, election leh chhiat rupna thil ah bak an duty tur a ni lo. Office-ah emaw thil dang atan chhawr phal an ni lo.
- School-ah post ruak 10% aia tam a awm tur a ni lo.
- A hranpa a tuition pek emaw lak emaw phal a ni lo.
- School kaihhraina duanlawk chu school in a zawm tur a ni.

Chapter V – Curriculum and Completion of Elementary Education

- Sawrkar ruat Academic Authority (SCERT) ten zirlaibu leh a endik dan an duang ang.
- Constitution tum leh hlutna mila zirlaibu siam tur ani..
- Continuous & Comprehensive Evaluation (CCE) hman tur a ni.
- Naupangte chu hlauhna leh zamna laka tih fihlim a, an ngaihdante zalen taka phawrh ngam tura tanpui.
- Elementary education an zawh hma chuan board exam neih tir loh tur.
- Mi hman tlak, mi puitling ni tura naupangte kawng engkima hmasawn tir.
- A theih chinah anmahni tawng ngeiin an zir tur a ni.
- Naupang Elementary Education zo tawh apiang chu certificate pek tur ani.

Chapter VI – Protection of Right of Children

- National Commission for Protection of Child Rights (NCPCR) leh State Commission for Protection of Child Rights (SCPCR) din tur ani.
- NCPCR leh SCPCR te hian RTE danin naupangte humhimna leh chanvo a pekte zir chiang leh ennawn in naupangte dikna leh chanvo an humhalh tur a ni. Naupangte chanvo chung changa lungawi lohna awmte a chhui chiang bawk ang.
- SCPCR din lohna state-ah chuan he dan hnuaia naupangte chanvo chungchanga vuina nei apiangin local authority hnenah ziakin a thlen thei ang.
- Naupangte chanvo humhalh na kawnga lungawi lohna neite complaint chu thla thum chungin an mahni bialtu thuneituten ngaihthla in thutlukna an siam tur ani.
- Tu pawh he thutluknaa lungawi lote chuan an lungawi lohna chu thuneitu sang zawk State Commission hnenah emaw local authority hnenah a thehltut leh thei ang.
- National Advisory Council (NAC) din tur ani. NAC chuan Central sawrkar hnenah RTE danin a tumte a hlawhtlin theihna tura hmalak dan tur thurawn a pe thin ang.
- State Advisory Council (SAC) din tur a ni. SAC chuan Central sawrkar hnenah RTE danin a tumte a hlawhtlin theihna tura hmalak dan tur thurawn a pe thin ang.

Chapter VII - Miscellaneous

- He danin a phal ti hlawhtling turin Central sorkarin a tul a tih ang zelin sorkara thuneitu remchang a tih te hnenah kaihraina a pe ang.
- He dan kenkawhna kawngah hian state sawrkarin dan an siam ve thei a ni. Dan siamte chuan mi zawng zawng thlei bik nei lovin a huap zo ngei tur a ni.

Conclusion

Kum zabi liam ta chhunga India ramim Compulsory Education dan kalpuinaa a tawn hriatah chuan a mipui nawlin compulsory education a mamawhna hi a lo hriatpuilo hle tih hi a ni a. Chuvangin Parliament House pahnihin 'Right to Free and Compulsory Education' Fundamental Rights list-a a khunglut hi a lawmawmin, hmasawna rahbi pawimawh tak a ni.

Heng basic principles - human rights, child rights, etc., te hi kan lo hriat ve a, naupangten he khawvela an nun khawchhuah ve theih nana zirtir hi kan tih ve tur a ni.

